



## TM - Uppgjör fjórða ársfjórðungs 2020

Sterkur fjórðungur hjá TM og góð afkoma á árinu

- Hagnaður TM samstæðunnar á árinu 2020 nam 5.311 m.kr. eftir skatta
- Hagnaður af rekstri á tímabilinu nam 3.423 m.kr.
- Ávöxtun fjárfestinga á árinu var 14,8%
- Afkoma váttrygginga var jákvæð um 1.158 m.kr. og samsett hlutfall 94,1%\*
- Hagnaður af fjármögnunarstarfsemi nam 32 m.kr.
- Hagnaður fyrir skatta næstu 12 mánuði er áætlaður 3.589 m.kr.

Sigurður Viðarsson, forstjóri TM:

*„Það er ánægjulegt að sjá kröftugan viðsnúning á fjórða ársfjórðungi hjá TM. Allar stoðir samstæðunnar skila jákvæðri afkomu og niðurstaðan er hagnaður upp á rúma tvo milljarða. Þrátt fyrir nokkurn samdrátt í iðgjöldum milli ára skilar lækkun eigin tjóna góðri niðurstöðu í váttryggingum og fjármögnunarstarfsemi skilar einnig hagnaði á fjórðungnum. Fjárfestingar félagsins skila framúrskarandi niðurstöðu á fjórðungnum, einkum vegna hagstæðrar þróunar á innlendum hlutabréfamarkaði.*

*Afkoma og starfsemi ársins 2020 var eðlilega lituð af COVID-19 faraldrinum. Iðgjöld í ferðaþjónustu og tengdum greinum drógust verulega saman, ásamt því sem bregðast þurfti við greiðsluvanda fyrirtækja með færslum í virðisrýrnun útlána. Fjármögnunarstarfsemi skilaði hagnaði á árinu, þrátt fyrir þær áskoranir sem fólust í faraldrinum og margvíslegum einskiptiskostnaði sem leiddi af kaupum TM á Lykli. Það verður að teljast góður árangur á krefjandi ári.*

*Niðurstaða ársins er hagnaður upp á rúma 5,3 milljarða króna, sem er afar góður árangur á ári sem einkenndist af mikilli óvissu og óvenjulegum aðstæðum.*

*Fyrir dyrum stendur nú samruni TM, Lykils og Kviku banka. Stefnt er að því að samruninn komi til framkvæmda á fyrsta ársfjórðungi þessa árs og ljóst að með honum verður til mjög öflugt félag sem verður í stakk búið að bjóða einstaklingum og fyrirtækjum framúrskarandi fjármálaþjónustu á öllum sviðum. Við göngum full tilhlökkunar til þess verkefnis.“*

### **Samsett hlutfall ársins var 94,1%**

Afkoma TM af váttryggingastarfsemi á fjórða ársfjórðungi batnaði umtalsvert milli ára og samsett hlutfall var 94,9% samanborið við 106,6% á sama tímabili árið 2019. Lækkun samsetts hlutfalls á fjórðungnum má einkum rekja til batnandi afkomu af eignatryggingum, sjótryggingum og ökutækjatrýggingum.

Á árinu 2020 var samsett hlutfall 94,1% og batnaði nokkuð milli ára, en samsett hlutfall ársins 2019 var 98,1%. Eigin iðgjöld drógust saman um 3,4% á árinu, fyrst og fremst vegna minnkandi umsvifa í erlendum skipatryggingum og áhrifa COVID-19 á viðskiptavinum félagsins í ferðapjónustu og tengdum greinum. Á sama tíma lækkuðu eigin tjón tímabilsins um 10,7% og munaði þar mestu um tjón í skipatryggingum. Ökutækjatjón lækkuðu einnig milli ára, en tjón í eignatryggingum og ábyrgðartryggingum þróuðust til verri vegar.

Afkoma váttrygginga á árinu 2020 nam 1.158 m.kr. borið saman við 644 m.kr. á árinu 2019.

### **Lykill fjármögnun skilar hagnaði á árinu**

Afkoma Lykils á fjórða ársfjórðungi snerist til betri vegar frá sama tímabili árið 2019 og niðurstaðan er hagnaður upp á 242 m.kr. samanborið við 22 m.kr. tap á síðasta ári. Vaxtatekjur drógust nokkuð saman á fjórðungnum, en á móti vegur lækkun vaxtagjalda. Virðisrýrnun útlána, sem var umtalsverð í upphafi árs, gekk að nokkru leyti til baka á fjórðungnum og rekstrarkostnaður var um fjórðungi lægri en á sama tímabili 2019.

Rekstur ársins 2020 gekk vel þrátt fyrir krefjandi árferði. Veruleg aukning var í leigusamningnum og útlánnum á árinu, en virðisrýrnun útlána vegna áhrifa COVID-19, ásamt einskíptiskostnaði vegna skipulagsbreytinga höfðu neikvæð áhrif á afkomuna.

Rekstrarspá til næstu 12 mánaða gerir ráð fyrir að afkoma fjármögnunar verði 414 m.kr.

### **6,9% ávöxtun fjáreigna á fjórða ársfjórðungi**

Fjárfestingatekjur námu 1.896 m.kr á fjórða ársfjórðungi 2020, sem jafngildir 6,9% ávöxtun. Þetta er besta ávöxtun fjáreigna og hæstu fjárfestingatekjur á einum ársfjórðungi frá því félagið var skráð aftur á markað árið 2013.

Afkoma allra eignaflokka var góð á fjórðungnum fyrir utan ríkisskuldabréf og handbært fé. Góð ávöxtun hlutabréfa skýrir þó langstærstan hluta fjárfestingatekna á fjórðungnum, eða rúmlega 70% teknanna, enda var innlendi hlutabréfamarkaðurinn mjög sterkur á tímabilinu. Skráðar hlutabréfaeignir hækkuðu þannig um 24,8% á fjórðungnum og stærsta skráða eignin, Arion banki, hækkaði um 24,7%. Þá var einnig mjög góð afkoma af óskráðum hlutabréfum, sem hækkuðu um 18,1%, en meiri hlutinn af þeim eignaflokki er óbein staða á skráð hlutabréf í gegnum fjárfestingar í Stoðum og Eyri.

Fjárfestingatekjur á árinu 2020 námu 3.792 m.kr., sem jafngildir 14,8% ávöxtun. Mjög góð ávöxtun var af óskráðum hlutabréfum en þau hækkuðu um 23,2% á árinu. Góð ávöxtun af stærstu óskráðu fjárfestingaeignum TM, eignarhlutum í Eyri, Stoðum og EE eignarhaldsfélagi (Eskju) vega þar þyngst. Afkoma af skráðum hlutabréfum var einnig mjög góð, um 22,5%. Eignatryggð skuldabréf og önnur verðbréf skiluðu einnig góðri ávöxtun á árinu en afkoma ríkisskuldabréfa var slök.

Í lok ársins námu fjárfestingaeignir 29.638 m.kr. og minnkuðu um 5.638 m.kr. á árinu, sem skýrist eingöngu af kaupum félagsins á Lykli fyrir um 9,6 ma.kr. Í lok ársins var 62% af fjárfestingaeignum í handbæru fé, skuldabréfum eða lánum, 29% var í hlutabréfum og 9% í öðrum verðbréfum.

### **Hagnaður ársins 2021 áætlaður um 3.589 m.kr.**

Rekstrarspá félagsins fyrir árið 2021 gerir ráð fyrir mun betra jafnvægi í afkomu váttrygginga-, fjárfestinga- og fjármögnunarstarfsemi samstæðunnar, auk lækkunar rekstrarkostnaðar.

Samsett hlutfall váttrygginga er áætlað um 94%, ávöxtun fjárfestinga um 8,9% og afkoma fjármögnunar um 414 m.kr.

### **Kynningarfundur kl. 16.15 miðvikudaginn 17. febrúar**

Kynning á afkomu félagsins á fjórða ársfjórðungi og árinu 2020 fer fram í höfuðstöðvum TM að Síðumúla 24 þann 17. febrúar kl. 16.15. Þar mun Sigurður Viðarsson forstjóri kynna uppgjórið og svara spurningum. Vegna gildandi samkomutakmarkana eru fundargestir vinsamlega beðnir um að boða komu sína fyrirfram með pósti á netfangið [fjarfestar@tm.is](mailto:fjarfestar@tm.is).

Einnig verður hægt að fylgjast með fundinum beint í gegnum vefinn á slóðinni [TM.is/fjarfestar](https://tm.is/fjarfestar) og senda inn spurningar í gegnum netfangið [fjarfestar@tm.is](mailto:fjarfestar@tm.is) á meðan kynningunni stendur.

Ársreikning og afkomutilkynningu verður hægt að nálgast á vef félagsins, [TM.is](https://tm.is), og kynning á uppgjörinu verður einnig aðgengileg á sama stað við upphaf kynningarfundar.

### **Fjárhagsdagatal 2021**

Aðalfundur: 18. mars 2021.

Uppgjör 1. ársfjórðungs: 27. maí 2021

Uppgjör 2. ársfjórðungs: 26. ágúst 2021

Uppgjör 3. ársfjórðungs: 25. nóvember 2021

Uppgjör 4. ársfjórðungs: 24. febrúar 2022

Nánari upplýsingar veitir Sigurður Viðarsson, forstjóri TM.

s: 515-2609.

[sigurdur@tm.is](mailto:sigurdur@tm.is).

\*Samsett hlutfall er reiknað út í samræmi við leiðbeinandi tilmæli Fjármálaeftirlits Seðlabanka Íslands nr. 1/2020, en hlutfallið er samanlagt tjónshlutfall, kostnaðarhlutfall og endurtryggingahlutfall reiknað út frá iðgjöldum tímabilsins. Ekki er tekið tillit til vaxta- og gengisbreytinga í samsettu hlutfalli.